



PËRSHKRIMI I GJENDJES

Problemi i mbeturinave është ndër problemet më të mëdha ambientaliste në Kosovë. Mungesa e një sistemi për menaxhimin e mbeturinave, grumbullimi jo i mirë i tyre, mungesa e vetëdijes, mungesa e klasifikimit të tyre dhe në fund edhe riciklimit, kanë bërë që qytetet e Kosovës, fshatrat, por edhe në përgjithësi natyra të jetë e mbuluar nga mbeturinat. Kompanitë ekzistuese që merren me grumbullimin mbeturinave funksionojnë me ndryshime nga një komunë në tjetrën, nganjëherë ndryshe në një rajon e ndryshe në rajonin tjetër, kurse kompetencat janë ndarë mes nivelit lokal dhe rajonal.

Kosova në aspektin e saj zhvillimor është e orientuar në zhvillimin e turizmit, kryesisht turizmit të natyrës, bazuar në promovimin e jetës së shëndetshme dhe pamjet e ambientit të pastër. Në këtë aspekt, Ministria e Mjedisit dhe Planifikimit Hapësinor ka iniciuar ndryshimin e Ligjit për mbeturinë, i hartuar në vitin 2005, pasi që ligji ekzistues nuk ka gjetur zbatueshmëri dhe nuk ka garantuar zgjidhjen e problemit të mbeturinave në Kosovë.

Bazuar në raportin "Gjendja e mbeturinave në Kosovë" të vitit 2008, hartuar nga Ministria e mjedisit, GTZ dhe Agjencia e Kosovës për Mbrojtjen e Mjedisit në Kosovë, nuk ka koordinim të mirë të të gjithë akterëve në sektorin e mbeturinave. Po sipas gjetjeve në këtë raport, ligji aktual për mbeturinat nuk është në përputhje me direktivat e BE-së për menaxhimin e mbeturinave.

PËRMBAJTJA E PROJEKTIT

Projekti jonë do të ndihmojë institucionet në hartimin e ligjit të ri, por edhe do të angazhohet që në këtë proces të përfshihen të gjithë akterët në këtë sektor, duke u siguruar atyre që mendimet e tyre do merren parasysh gjatë hartimit të ligjit dhe të kemi një proces sa më gjithëpërfshirës, e për pasojë- një ligj që do gjejë sa më shumë zbatim në Kosovë, duke qenë në të njëjtën kohë edhe në përputhje me direktivat nga BE për këtë sektor. "Syri i Vizionit" me anë të këtij projekti synon të mbulojë këtë boshllëk që është i pranishëm gjatë hartimit të ligjit. Projekti do përfshijë në këtë proces gjithë akterët e sektorit, duke përfshirë shoqërinë civile, OJQ-të ambientale dhe tjera që kanë përvojë me legjislacionin, komunat, kompanitë për menaxhimin e mbeturinave në komuna dhe rajone, përfaqësues të biznesit, komunitetit, etj. në mënyrë që të gjithë të pasurojnë hartimin e këtij ligji si një garanci që ligji do të ketë zbatim më të mirë. Po ashtu me angazhimin e ekspertëve të jashtëm ne do ndihmojmë hartuesit e ligjit për përshtatjen e ligjit me standardet evropiane, përputhjen me direktivat që vijnë nga BE në këtë sektor.

Ne kemi krijuar një përvojë të mirë nga projekti që tashmë po realizon organizata jonë prej vitit 2009 me emrin "Ndikimi i grupeve lokale të interesit në vendimmarrje në nivel qendror" i mbështetur nga USAID, përmes Programit për Fuqizimin e Shoqërisë Civile implementuar nga Instituti për Komunitete të Qëndrueshme (ISC), në kuadër të të cilit po ndikohet në Parlamentin e Kosovës për ndryshimin e Ligjit për pyjet. Në kuadër të këtij projekti, ne kemi bashkëpunim shumë të mirë me Komisionin parlamentar për Bujqësi, pylltari, zhvillim rural, mjedis dhe planifikim hapësinor për ndryshimin e Ligjit për pyjet dhe ne jemi në kontakt të vazhdueshëm me 22 deputetë nga rajoni i Pejës përmes Zyrës së kontaktit që ka hapur organizata jonë në ndërtesën e Komunës së Pejës.

PROJEKTI NDIKIMI I GRUPEVE TË INTERESIT NË NDRYSHIMIN E LIGJIT PËR MBETURINA KONFORM DIREKTIVAVE TË BE-SË



USAID
NGA POPULLI AMERIKAN
OD AMERICKOG NARODA



INSTITUTE FOR
Sustainable
Communities

Programi për Fuqizimin e Shoqërisë Civile



» NDIKIMI I GRUPEVE TË INTERESIT NË NDRYSHIMIN E LIGJIT PËR MBETURINA KONFORM DIREKTIVAVE TË BE-SË «

TAKIMET INFORMUESE PËR PROJEKTIN

Në muajin e parë do të mbahen takime me të gjitha akterët në këtë proces: ministrinë e ambientit, komisionin parlamentar për Bujqësi, pylltari, zhvillim rural, mjedis dhe planifikim hapësinor, OJQ-të mjedisore, autoritet komunale e regjionale, organizatat e mbeturinave, etj. Në këto takime do të prezantohet projekti dhe do të merret një pasqyrë e plotë e gjendjes në këtë sektor.



TAKIME ME GRUPE TË INTERESIT NË NIVEL RAJONAL

Në këto takime do të jenë të përfshira agjencionet të ndryshme të cilat merren me menaxhimin e mbeturinave, riciklimin e mbeturinave, OJQ-e të ndryshme për mbrojtje të ambientit, zyrtarë komunalë dhe grupe tjera të interesit. Takimet do të mbahen në shtatë qendrat e mëdha të Kosovës: Prishtinë, Mitrovicë, Gjilan, Prizren, Ferizaj, Gjakovë dhe Pejë. Nga këto takime do dalin rekomandimet që do t'i dorëzohen Ministrisë së Mjedisit dhe Planifikimit Hapësinor dhe Parlamentit të Kosovës, përmes Komisionit parlamentar për Bujqësi, pylltari, zhvillim rural, mjedis dhe planifikim hapësinor.

TAKIME MË GRUPE TË INTERESIT NË NIVEL NACIONAL

Në këtë aktivitet do të jenë të përfshirë, shoqëria civile, zyrtarë të Zyrës së rregullatorit për mbeturina, Agjencioni për menaxhimin e mbeturinave, Ministria e mjedisit dhe planifikimit hapësinor, zyrtarët komunalë dhe grupe të ndryshme të interesit. Do të analizohen dhe do të përpunohen rekomandimet që kanë dalë nga takimet e veçanta nëpër rajone, para se ato t'u dorëzohen ministrisë dhe parlamentit.



ORGANIZIMI I TAKIMEVE MË EKSPERTË PËR HARMONIZIMIN E LIGJIT ME STANDARDET E BE

Në këto takime me ekspertë të jashtëm që do të angazhohen, do të analizohet draft ligji, për të shikuar përshtatshmërinë e tij konform direktivave evropiane. Deri në përfundim të projektit do të mbahen 4 takime me ekspertë, të cilët nga një fazë në tjetrën do analizojnë përmbajtjen e ligjit duke e krahasuar me rekomandimet dhe direktivat e BE-së.

PËRCJELLJA E TAKIMEVE TË GRUPIT PUNUES PËR HARTIMIN E LIGJIT

Gjatë tërë kohës do të përcjellim takimet e grupit punues parlamentar për hartimin e ligjit për mbeturina, për të monitoruar përfshirjen e rekomandimeve të dala nga grupet e interesit dhe nga raporti i gjendjes së mbeturinave në Kosovë.

* * *

OJQ "Syri i Vizionit" mirëpret gjithë ndihmën që mund të japin të gjitha subjektet për realizimin e objektivave të këtij projekti. Të gjithë së bashku mund të bëjmë më shumë për legjislacion më të mirë dhe për ambient më të pastër

